

Lelaki tidak mengaku salah tuduhan berjudi di tempat awam

MIRI: Mahkamah Sesyen di sini, semalam menetapkan 5 November depan untuk pengurusan kes seorang lelaki yang mengaku tidak bersalah atas tuduhan bermain judi di tempat awam.

Sementara itu, tertuduh diperintahkan dibebas dengan jaminan RM500 berserta seorang penjamin tempatan sementara menunggu tarikh tersebut.

Mohammad Faezzul Aba, 33, dari Kampung Pejuang Kelulut, Bekenu telah didakwa mengikut Seksyen 7 (2) Akta Rumah Judi Terbuka 1953 yang memperuntukkan denda tidak melebihi RM5,000 atau penjara hingga enam bulan atau kedua-duanya sekali jika sabit kesalahan.

Berdasarkan pertuduhan kes, tertuduh telah didakwa bermain judi jenis judi dalam talian di tempat awam.

Dia didakwa melakukan kesalahan itu pada jam 5.30 petang, 26 Oktober lalu di hadapan sebuah premis di Lorong Desa Senadin 2C-9, Jalan Desa Senadin di sini.

Pendakwaan kes dilakukan Inspektor Mudzilawati Abdul Rahman di hadapan Hakim Azreena Aziz.